



Bordi

VENDIM

Nr. 264, Datë 20.12.2018

MBI

VENDOSJEN E PERIUDHËS TRANZITORE PËR BËRJEN EFEKTIVE TË TRANSFERIMIT TË LICENCAVE TË OPERIMIT TË SISTEMIT TË SHPËRNDARJES SË ENERJISË ELEKTRIKE, TË SHOQËRISË OPERATORI I SHPËRNDARJES SË ENERJISË ELEKTRIKE SH.A (OSHEE SH.A), TEK SHOQËRIA "OPERATORI I SISTEMIT TË SHPËRNDARJES" SH.A (O.S.SH SH.A); LICENCËS SË FURNIZIMIT ENERJISË ELEKTRIKE DHE DETYRIMIT TË SHËRBIMIT UNIVERSAL TË FURNIZIMIT TË ENERJISË ELEKTRIKE, TË SHOQËRISË OPERATORI I SHPËRNDARJES SË ENERJISË ELEKTRIKE SH.A (OSHEE SH.A), TEK SHOQËRIA "FURNIZUESI I SHËRBIMIT UNIVERSAL" SH.A (FSHU SH.A)

Në mbështetje të neneve 16 dhe 37, pika 2, gërmat "c", "ç" të Ligjit nr. 43/2015, "Për Sektorin e Energjisë Elektrike", i ndryshuar, nenit 3, pika 50, nenit 22, pika 2, gërmat "a" dhe "b", të Ligjit Nr. 102/2015, "Për Sektorin e Gazit Natyror"; nenit 113 pika 3, të Ligjit Nr. 44/2015, "Kodi i Procedurave Administrative", si dhe nenit 15 të "Rregullores për organizimin, funksionimin dhe procedurat e ERE-s", miratuar me vendimin e Bordit të ERE-s nr. 96, datë 17.06.2016, Bordi i ERE, në mbledhjen e tij të datës 20.12.2018, mbasi shqyrtoi relacionin e përgatitur nga Drejtoritë Teknike për përcaktimin e periudhës tranzitore për bërjen e efektive të transferimit të licencave të operimit të sistemit të shpërndarjes së energjisë elektrike, të shoqërisë Operatori i Shpërndarjes së Energjisë Elektrike sh.a (OSHEE sh.a), tek shoqëria "Operatori i Sistemit të Shpërndarjes" sh.a (O.S.SH sh.a); licencës së furnizimit të energjisë elektrike dhe detyrimit të shërbimit universal të furnizimit të energjisë elektrike, të shoqërisë Operatori i Shpërndarjes së Energjisë Elektrike sh.a (OSHEE sh.a), tek shoqëria "Furnizuesi i Shërbimit Universal" sh.a (FSHU sh.a),

Konstatohet se:

- Në kuadër të reformës në sektorin e energjisë dhe në zbatim të Ligjit Nr. 43/2015, "Për sektorin e energjisë elektrike", i ndryshuar, VKM Nr. 519, datë 13.7.2016, "Për miratimin e Modelit të Tregut të Energjisë Elektrike", si dhe të Urdhrit Nr.157, datë 12.02.2018, mbi "Krijimin e tri shoqërive të kontrolluara nga Operatori i Shpërndarjes së Energjisë Elektrike", OSHEE sh.a. ka themeluar tri shoqëri si më poshtë:
 - **Operatori i Sistemit të Shpërndarjes sh.a (OSSH sh.a)** me ofertë private, me objekt veprimtarie shpërndarjen e energjisë elektrike, ndërtimin, funksionimin dhe mirëmbajtjen e rrjetit të shpërndarjes së energjisë elektrike për sigurimin

e energjisë elektrike klientëve, lidhjen e klientëve dhe përdoruesve të rrjetit të shpërndarjes së energjisë elektrike, instalimin dhe shërbimet e matjes së energjisë elektrike etj., si dhe çdo veprimtari tjetër fitimprurëse me interes për shoqërinë;

- **Furnizuesi i Shërbimit Universal sh.a** (FSHU sh.a) me ofertë private, me objekt aktiviteti në: furnizimin me energji elektrike të klienteve fundorë që veprojnë në treg të rregulluar të përcaktuar nga legjislacioni në fuqi, ofrimin dhe sigurimin e cilësisë tregtare të shërbimit, si dhe çdo veprimtari tjetër fitimprurëse me interes për shoqërinë.
- **“Furnizuesi i Tregut të Lirë” sh.a**, (FTL sh.a) me oferte private, me objekt aktiviteti në blerjen dhe menaxhimin e energjisë dhe operimin në tregun e lirë etj, si dhe çdo veprimtari tjetër fitimprurëse me interes për shoqërinë.
- ERE me vendimin nr. 198, datë 03.09.2018, ka licencuar shoqërinë “Furnizuesi i Tregut të Lirë sh.a”, (FTL sh.a) në veprimtarinë e tregimit të energjisë elektrike”; Me vendimin nr. 199, datë 03.09.2018, ka licencuar shoqërinë “Furnizuesi i Tregut të Lirë sh.a”, (FTL sh.a) në veprimtarinë e furnizimit të energjisë elektrike”; Me vendimin nr. 215 datë 11.10.2018, ka transferuar licencën e furnizimit energjisë elektrike, miratuar me vendimin e Bordit të ERE-s Nr. 97, datë 27.10.2014, e vlefshme deri më datë 27.10.2019 dhe detyrimin të shërbimit universal të furnizimit të energjisë elektrike, të shoqërisë Operatori i Shpërndarjes së Energjisë Elektrike sh.a (OSHEE sh.a), miratuar me vendimin e Bordit të ERE-s Nr. 112, datë 08.07.2016, tek shoqëria "Furnizuesi i Shërbimit Universal sh.a" (FSHU SH.A.)” dhe me vendimin nr. 216, datë 11.10.2018, ka transferuar licencën për operimin e sistemit të shpërndarjes së energjisë elektrike, të shoqërisë Operatori i Shpërndarjes së Energjisë Elektrike sh.a (OSHEE sh.a), miratuar me Vendimin e Bordit të Komisionerëve të ERE-s, Nr. 96 datë 27.10.2014, tek shoqëria "Operatori i Sistemit të Shpërndarjes OSSH SH.A, e vlefshme deri më datë 27.10.2044.”
- Shoqëria OSHEE sh.a me shkresën me nr. 21171 Prot datë 26.11.2018, ka përcjellë në MIE kërkesën për orientim në kuadër të ndarjes së shoqërisë OSHEE sh.a.
- Referuar garantimit të furnizimit dhe cilësisë së shërbimit, OSHEE sh.a vëren që tre janë elementet për të cilat kërkohet qartesi për detyrimet dhe te drejtat që lindin për Operatorin e Sistemit të Shpërndarjes, nga;
 - kërkesat për rregulloren e cilësisë;
 - kërkesat për akses në rrjetin e shpërndarjes të burimeve gjeneruese;
 - sigurimi i aksesit për përdoruesit.
- Tre kërkesat e sipërpërmendura janë të përcaktuara në rregulloren e cilësisë së shërbimit të shpërndarjes, për të cilat OSHEE sh.a ka aplikuar në ERE lidhur me shtyrjen e afateve dhe kërkesës në mënyrë të përshkallëzuar të kritereve standarde të performancës për zona të ndryshme, bazuar në rivlerësimin e performancës në këto zona gjatë periudhës tranzitore dhe situatës së sektorit të shpërndarjes së energjisë elektrike.

- Më tej, një pjese e efekteve e rëndësishme në cilësinë e shërbimit të shpërndarjes rrjedh nga lidhja e burimeve gjeneruese në rrjetin shpërndarës të OSSH sha. Në këto zona, rrjeti shpërndarës është i paplanifikuar për të injektuar energji elektrike nga burime të tjera alternative.
- Çështje tjetër që kërkon vëmendje për zgjidhje janë transformatorët e fuqisë në pronësi të të tretëve që përbëjnë 47% të gjithë inventarit të kabinave elektrike të lidhura në Sistemin e Shpërndarjes.
- Kërkohe kohë për përcaktimin e saktë të strukturave organizative dhe proceseve të menaxhimit të portofolit të energjisë elektrike në përputhje me funksionet dhe veprimtaritë që do të mbulojë çdo operator;
- Gjithashtu kërkon rishikimin dhe plotësimin e kuadrit ligjor dhe nënligjor në përputhje me detyrimet për sigurimin e furnizimit pa ndërprerje dhe sipas standarteve të cilësisë ndaj konsumatorëve.
- Në vijim Ministria e Infrastrukturës dhe Energjisë (MIE) me shkresën e protokolluar në ERE me nr. 798/1, datë 19.12.2018, ka përcjellë për dijeni orientimin në kuadër të ndarjes së shoqërisë OSHEE sh.a.

Në këtë korrespondence MIE ndan shqetësimet që lidhen me:

- përcaktimin e saktë të strukturave organizative dhe proceseve të menaxhimit të portofolit energji elektrike në përputhje me funksionet dhe aktivitetet që të mbulojë çdo operator;
 - rishikimin dhe plotësimin e kuadrit ligjor dhe nënligjor në përputhje me detyrimet për sigurimin e furnizimit pa ndërprerje dhe sipas standarteve të cilësisë ndaj konsumatorëve.
 - ndryshime nënligjore të propozuara duke referuar në një model tregu i cili mund të konsiderohet si një model optimal jo vetëm për OSHEE sh.a, por edhe për operatorët e tjerë të sektorit të Energjisë elektrike, ku objektiv mbetet qëndrueshmëria e sektorit apo përmbushjen e detyrimeve të tjera të parashikuara në ligj.
- Në vlerësimin paraprak të zgjidhjeve të propozuara, MIE në cilësinë e aksionerit të shoqërisë OSHEE sh.a, gjykon të përshtatshme një periudhë tranzitore prej 12 muaj për bërjen efektive të transferimit të licencave të miratuara nga ERE me vendimet respektive.
 - Periudha tranzitore 12 mujore është e nevojshme për nxjerrjen e akteve ligjore dhe nënligjore respektive.
 - Në vijim OSHEE sh.a me shkresën me nr. 798 Prot., date 19.12.2018, bazuar në nenin 37 të Ligjit nr. 43/2015, "Për Sektorin e Energjisë elektrike", i ndryshuar, kërkon nga ERE përcaktimin e një periudhe tranzitore të transferimit të licencave të miratuara nga ERE sipas propozimit të përcjellë nga MIE.

Për gjithë sa më sipër, Bordi i ERE,

Vendosi:

1. Përcaktimin e një periudhe tranzitore prej 12 muaj, për bërjen e efektive të transferimit të licencave të operimit të sistemit të shpërndarjes së energjisë elektrike, të shoqërisë Operatori i Shpërndarjes së Energjisë Elektrike sh.a (OSHEE sh.a), tek shoqëria "Operatori i Sistemit të Shpërndarjes" sh.a (O.S.SH sh.a); miratuar me vendimin e Bordit të ERE nr. 216, datë 11.10.2018; licencës së furnizimit energjisë elektrike dhe detyrimit të shërbimit universal të furnizimit të energjisë elektrike, të shoqërisë Operatori i Shpërndarjes së Energjisë Elektrike sh.a (OSHEE sh.a), tek shoqëria "Furnizuesi i Shërbimit Universal" sh.a (FSHU sh.a) miratuar me vendimin e Bordit të ERE nr. Nr. 215, datë 11.10.2018.
2. Deri në përfundimin e periudhës tranzitore prej 12 muaj, veprimtaritë e operimit të sistemit të shpërndarjes së energjisë elektrike; furnizimit të energjisë elektrike dhe detyrimit të shërbimit universal të furnizimit të energjisë elektrike, do të vazhdojnë të kryhen nga OSHEE sh.a.
3. Drejtoria Juridike dhe e Mbrojtjes së Konsumatorit të njoftojë të interesuarit për Vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

Ky vendim mund të ankimohet në Gjykatën Administrative Tiranë, brenda 30 ditëve kalendarike nga botimi në Fletoren Zyrtare.

KRYETARI
Petrit AHMETI

